

Qeqqata Kommuni

Siumut aamma Inuit Ataatigii
tunngaviusuk suleqatigiinnissami
isumaqatigiissut 2025 – 2029

Meeqquerivinniit utoqqarnut sullissineq pitsaasoq
Inuiaqatigiit peqqissut imminunnullu napatittut
Aningaasarsiornikkut inuussutissarsiornikkullu
siuariartorneq



Kommunalbestyrelsemi suleqatigiinnissamut isumaqatigiissut

Qeqqata kommuniani ukiuni tulliuttuni 2025-2029 Siumut aamma Inuit Ataatigiit suleqatigiinniarluta isumaqatigiippugut.

Suleqatigiinnissami qulequttat ataani allassimasut immikkut pingaartillutigit sulissutigineqarnissaat isumaqatigissutigivagut:

Meeqquqeriveqarneq:

Inuiaqatigiit atuarfiillu ingerlalluarnissaannut meeqquqeriviit pinngitsoorneqarsinnaanatillu pingaarutilimmik aalajangiisooqataapput.

Qulequttat ukua sulissutigissavagut:

- Atorfiit tamakkiisumik inuttaqalernissaat anguniarneqassasoq, nunattalu iluaniit pissarsisoqarsinnaanngippat nunatta avataaniit sulit tikisitseqqinnissaq periarfissaassasoq.
- Atorfiit pioreersut amerlinissaat misissorneqassasoq.
- Nerisaqartitsinerup kommunimiit tigoqqinneqarsinnaanissanut periarfissat misissorneqassasut.
- Sulisut ineriartortinneqartuarnissaat ukkatarineqassasut.
- Meeqquqerivimmuut akiliutigineqartartup sapinngisamik appassissumik inissisimanissaa attatiinnarneqassasoq.
- Meeqqanut meeqquqerivinniittunut socialrådgiverinik atorfinitsitsinissaq.
- Najugaq qimannagu perorsaasut ilinniarsinnaaleqqinnissaat anguniarneqassaaq.
- Ikiortit ilinniarsimanngitsut ilinniarsinnaanissat periarfissarsiuunneqassaaq.

Meeqqat Atuarfii:

Meeqqat atuarfii meeqqat siunissaannut imminullu napatinnissaannut atorfiillu ilinniarsimasunik pisariaqartitsiviusut nammineq nunatta inuinit inuttaqalernissaannut pingaarutilerujussuarmik inissisimapput.

Qulequttallu ukua sulissutiginiarpagut:

- Atuartitsissutit, atuarnerullu sivilissusaat pisariaqartitat aallaavigalugit atuarfiit suleqatigalugit tulluarsarneqassasut.
- Atuartitsissutini aalajangersimasuni angusarineqartartut qaffassarneqarnissaat immikkut ukkatarineqassasut.
- Ilinniarfinnut ingerlaqqittartut amerlisarneqarnissaat.
- Aasaanerani atuannigiffeqartarnerup piffissaa nalilersorneqaqqissasoq.
- Akuerineqarani atuannitsoortarnerit inortuisarnerillu annikillisarneqarnissaat ukkatarineqassasoq.
- Ersinngitsumik innarluutilinnut immikkut atuarfiup avataani atuarfissaannik pilersitsinissaq.
- Ilinniartitsisut pisariaqartitaminnut pikkorissarneqartarnissaat.
- Atuarfinni nerisaqartitsineq nalilersorneqassaaq.
- Najugaq qimannagu ilinniartitsisunngorniarsinnaaneq annertusarneqassaaq.
- Kangaamiuni atuarfiup iluarsartuunneqarnissaa piviusunngortinneqassasoq. –
- Atuartitsinermi timimik aalatitsineq asimiinnerlu atorneqarnerulernissaat sulissutigineqassasoq.

Utoqqaat:

- Utoqqarnut siusinaartumillu sulisinnaajunnaarnersiutilinnut peqqinnartumik ornittagaqarnissaannik qulakkeerinninnissaq.
- Kisermaamut aappariinnullu kaasarfimmiussatut minnerpaaffiliussat 5.000/8.000kr. akit qaffakkiartornerannut malinnaatinneqassasut.
- Utoqqaat angalatinneqartarnerat akeqanngitsumillu bussertinneqartarnerisa ingerlatiinnarneqarnissaat.
- Utoqqaat pisinnaatitaaffiinnik qaammarsaavigineqartuarnissaat.
- Sisimiuni puiguttunngortunut angerlarsimaffimmik nutaamik sananissaq.
- Maniitsumi utoqqaat angerlarsimaffiata nutarsarneqarnissaa.

- Maniitsumi inersimasut innarluutillit utoqqaat angerlarsimaffianni najugallit immikkut allami najugaqalernissaat sulissutigineqassaaq.
- Utoqqaat angerlarsimaffiini sulisussat nunatta iluani pissarsiarineqarsinnaanngippata, nunatta avataaniit tikisitseqqinnissaq ammatinneqassasoq.
- Utoqqaat inuussutissaannik naatsorsuutitsinnermi TV aamma internet ilanngunneqarnissaat anguniarneqassaaq.
- Utoqqaat amerliartornerat ilutigalugu utoqqarnik sullissisut nalimassarneqarnissaat sillimaffigineqassaaq.

Innarluutillit:

- Innarluutillit pisinnaatitaaffitsik malillugu sullinneqarnissaat.
- Innarluutilinnut sullissisut ilinniarsimanngitsut sullitaminnut tunngatillugu ilinniarnissaannut pikkorissarnissaannullu neqeroorfigineqartuarnissaat.
- Innarluutillit milikartoorsimasullu timersortarfimmik akeqanngitsumik atuisinnaatitaanerisa attatiinnarneqarnissaat.
- Ersinngitsumik innarluutillit angajoqqaavisalu ukkatarineqarnissaat.
- Kommuni pigisaanut tamanut innarluutillit ajornanngitsumik isersinnaanissaat qulakkerneqassaaq.
- Inersimasut annertuumik innarluutillit angerlarsimaffissaannik Naalakkersuisut kommunetsinni pilersitsinissaannik piunaffiginissaat.
- Ersinngitsumik innarluutillit soorlu ADHD-qartut Autismeqartullu atuareernerup kingorna illumik ornittagassaannik ujartuinissaq.

Inunnik isumaginninneq, Angajoqqaat, Meeqqat, inuusuttut:

Meeqqat amerlanerpaat angerlarsimaffimmi toqqissillutik angerlarsimasalernissaat anguneqassappat angajoqqaat siunnersorneqarnissaminnik pisariaqartitsisut immikkut annertusisamik sammineqartariaqput.

Qulequttat ukua sulissutigineqassapput:

- Angajoqqaanik nukittorsaaneq/katsorsaaneq annertusarneqassaaq.
- Angerlarsimaffimmi tapersersuisut (hjemmehossere) amerlinissaat.
- Meeqqat toqqissillutik ornittagaannik Sisimiunisuulli Maniitsumi pilersitsinissaq misissorneqassaaq.

- Qimarnguinnik illut pioreersut atorlugit pilersitsinissaq sulissutigineqassaaq.
- Atuartut peqqissusaannik misissuinnermi inernerit ernumanartumik takutisut immikkut ukkatarineqartassasut.
- Inuusuttut angerlarsimaffiup avataanut inissinneqarsimasut 18-inik ukioqaleersimasunut malitseqartitsilluni namminiilernissannut init pioreersut atorlugit sumiiffissaannik (efterværn) amerlanerusunik pilersitsinissaq.
- Angerlarsimaffeqanngitsunut unnuisarfiit ammasarfii sivitsorneqassapput, ullukkullu sammisaqartitsivigisinnaasaannik periarfissat misissorneqassallutik.
- Ilaqutariit meeqqanik paarsisartut pisariaqartitaannik tapersersorneqarnissaat.
- Miljøarbejderit amerlineqarnissaat sulissutigineqassasooq.
- Angajoqqaarsiat, angajoqqaarsiaasimasullu misigisartagaat oqimaatsut eqqarsaatigalugit imaajartareqarnissaannik neqeroorfigineqartassasut.
- Peqqissarnermi asip atorluarneqarnissaa aqutissiuunneqassasooq.

Timersorneq, Timikkut eqqarsartaatsikkullu peqqinneq, Kulturi

Timersorneq kulturilu tassaapput inuiaqatigiinnik tamanik annertunerpaamik ataatsimoortitsisut aammalu aanngajaarniutininik atuilinnginnissamut pinaveersaartitsisutit annerpaat. Taamaattumik timersornerup kulturilerinerullu suli annertuumik tapersersorneqarnissaat isumaqatigiissutigivarput.

Qulequuttat ukua sulissutigineqassapput:

- Timersornermut kulturilerinermullu tapiissutit pitsanngorsarniarlugit nalilersorneqaaqqissapput.
- Kommunitsinni pissartanngorniuttoqartillugu unnuiffiusinnaasut pitsanngorsarneqarnissaat misissorneqassaaq.
- Timersoqatigiit Kattuffiannik suleqateqarnerput ingerlatiinnassavarput.
- Atuartut peqqissusaannik misissuisarneq ingerlaannaassaaq.
- Sisimiuni sisorartarfimmik nutaamik sananissaq piviusunngortinneqassaaq.
- Sisimiuni nutaamik arsaattarfiliornissaq piviusunngortinneqassaaq.
- Sisimiuni Maniitsumilu naluttarfiliornissamut suliniutit piaartumik ingerlateqqissapput.
- Maniitsumi sisorartarfiup tungaanut aqqusineq naammassineqassaaq, sisorartartullu peqatigalugit sisorartarfik ineriartortillugu.

- Nutaamik timersortarfittarnissaq piareersarlugu aallartinneqassaaq.
- Nalunnguarfiup sisorartarfiani atuisunut perusuersartarfimmik pilersistsisoqassaaq.
- Sungiusaasut akissarsiaqartinneqalersinnaanerat misissorneqassasoq.
- Nammineq kajumissutsiminnik suliaqarlutik pilersitsiniartut tapersersorneqassapput.
- 8-14 akornganni ukiullit atuareernerup kingorna unnukkullu ornitassaqarnissaat.

Aalisarnek, Piniarnek:

Aalisarnek piniarnerlu tassaapput aningaasarsiornitsinni imminullu pilersornermi pingaaruteqarnerpaat. Taamaattumik peqatigiiffiit qanimut suleqatiginerunissaat, aalisartitseqatigiiffiillu qanimut suleqatigalugit qulequttat ukua sulissutigerusuppagut:

- Aalisartunut piniartunullu atugassarititaasut pitsanngorsarneqarnissaat.
- Sissami umiarsualiveqarnermut tunngasunut nunaminertanik sanaartorfiusinnaasunik pilersitsinissaq.
- Kangerlussuarmi piniartunut umimmanniarnerullu nalaani sullivimmik eqqussiviusinnaasumik pilersitsinissaq.
- Kalaalimineerniarfiit ullutsinnut naleqqussarnissaat.
- Aalisartut piniartullu illut sullivii ullutsinnut naleqqussarnissaat.
- Aalisartut piniartullu siuarsarneqarnissaannut siunnersorneqarnikkut ACB suleqatigalugu nukittorserneqarnissaat.
- Ukiuunerani umimmanniartarnermut aqutsineq kommunip nammineq ingerlatilernissaa Naalakkersuisunut anguniarneqassasoq.
- Sissami puttasunik amerlanerusunik pilersitsinissaq.
- Aalisartut piniartullu aallartitassaannik (ambassadør) pilersitsinissaq periarfissarsiuunneqassaaq.

Aningaasarsiorneq, Takornariaqarneq, Sanaartorneq:

Suliffeqarfiit namminersortut ingerlalluartut tassaapput innuttaasut atugarissaarnissaannut kommunillu ineriartornissaanut pingaarutilimmik aningaasalersueqataasut. Taamaattumik suliffeqarfinnik namminersortunik suleqateqarnerput pitsaasoq tapersersuisorlu ingerlateqqissavarput.

Qulequttallu uku sulissutigineqassapput:

- ACB-mik Sulisitsisullu peqatigiiffianik (GE) qaninnerusumik suleqateqarneq.
- Takonarissat aningaasaateqarnerusut ukkatarineqarnerunissaat.
- ATV-nut aqqusineq ineriartortinneqassasoq.
- Kommunip Sisimiuni umiarsualiviata namminersortunngorsarneqarnissaata naammassineqarnissaa.
- Nationalpark-ip nunamik atuisut peqataatinnerisigut piviusunngortinneqarnissaa.
- Kangerlussuup nunatta avataaniit inuinnarnit miffigineqarsinnaajuaannarnissaata qulakkeernissaa.
- Apussuarnut ATV-inut aqqusineq sananeqassaaq.
- Illersornissamut isumaqatigiisummut tunngatillugu Kangerlussuup atorneqarsinnaaneranut periarfissanut ammanissaq.
- Kangerlussuup Cargo centeritut atorneqarsinnaanissaanik periarfissanik misissuisoqassasoq.
- Tasersiap piviusunngortinneqarnissaanut peqataanissaq.
- Saviminilerinermik Ilinniarfiup nutaap Sisimiuni pinngitsoorani sananeqarnissaanut Naalakkersuisunut sulii piumasaqarnissaq.
- Maniitsup alliarturnera kangimut timmut aallartisarneqassaaq.
- Kikkulluunniit piumasaqaatinik naammassinissimallutik ineriartortitsiniartut illersorneqartassasut.
- Inissianik nalinginnaasunik attartugassanik sanaartornissaq.
- Sisimiut Kangerlussuullu akornganni pisuttunut akeqartitsilernissaq sulissutigineqassaaq.
- Illoqarfinni takonarissanut innuttaasunullu akiliilluni perusuersartarfiit pilersinneqarnissaat.

Kommunip aqunneqarnera, ulluinnarni ingerlatsineq (drift) kommunimilu sulisut:

Innuttaasut sullinneqarneranni kommunimi sulisut pinngitsoorneqarsinnaanngillat. Taamaattumik sulisunut atugassarititaasut pitsaasuunissaat aammalu sullissinerup pitsaasuunissaa qulakkeerniarlugu sulisut ineriartoqqinnissaminnut periarfissaqartuaannarnissaat pingaaruteqarpoq.

Qulequttallu ukua sulissutigissavagut:

- Sulisut sapaatip akunneranut 36-37 tiimit sulisalernissaat anguniarneqassaaq.
- Ingerlatsinermi aningaasartuutit annertuumik qaffakkiartunnginnissaat anguniarneqassasoq.
- Kommuni avinneqassanersoq pillugu innuttaasunik ukioq manna taasititsisoqassasoq.
- Kommunit tamarmiullutik suleqatigiiffissaata pilersinneqarnissaa sulissutigalugu nanginneqassasoq.
- Nunaqarfinnut aningaasaliissutit inuttussuseq aallaavigalugu naleqqussarneqassasut.
- Kommunip suliffeqarfiutaani tamani sulinerup nalaani pujortaqqusinnginneq attatiinnarneqassanersoq pillugu, sulisunut piaartumik taasisitsissutigineqassasoq. Taasisitsinermilu amerlanerussuteqartut isumaat kommunalbestyrelsemit malinneqarlunilu ataqqineqassaaq.
- Atortut ataavartumik nutarterneqartuassasut.
- Inoqarfinni tamani aqquuserngit innuttaasunut innarluutilinnullu isumannaatsuunissaat anguniarneqassasoq.
- Kommunimi inoqarfiit tamarmik takujuminartuunissaat torersuunissaallu piumasaqaataassasoq.
- Illut innuttaasunit nammineq pigineqartut eriagisassaanerisa atorunnaarsinneqarnissaat piaartumik sulissutigineqassasoq.
- Nunaqarfinni aqquuserngit iluarsaanneqarnissaat sulissutigineqassapput.
- Illoqarfinni nunaqarfinnilu illunut isatigassanut aningaasaliinissaq.
- Iliveqarfiit malinnaatinneqarnissaat.